

Propuesta pa Aruba ofrece 'Agri-Turismo' como producto turistico



ORANJESTAD – Segun un comunicado di gobierno, recientemente ATA (Aruba Tourism Authority) den cooperacion cu Santa Rosa (Departamento di Agricultura, Cria y Pesca) a organisa e seminario 'From Cunucu to Table'. E meta di

e seminario aki tabata pa cuminsa crea un conexion entre e mundo turistico y agricultor na Aruba, pa asina crea e posibilidad di ofrece un producto mas autoctono y atractivo na nos turistanan.

"No ta un secreto cu un

bishitante cu dicidi di pasa su vakantie na cualkier pais ta desea di conoce di cerca un poco di e cultura di e lugu cu e ta bishitando, y logicamente Aruba no ta e excepcion", e comunicado ta bisa. Teniendo na cuenta cu mas di 70% di nos economia ta depende di turismo, nos pais mester

keda sondea opcionnan nobo y diferente pa por resalta y mantene su mes den e destinacionnan turistico mas frecuente den Caribe. Ta pa es motibo cu ATA den cooperacion cu Santa Rosa, a bin cu e iniciativa di 'From Cunucu to Table', pa asina cuminsa traha e caminda pa e industria turistico local traha di cerca cu nos agricultornan y ofrece un producto netamente Arubano.

E comunicado ta sigui splica cu e seminario 'From Cunucu to Table' a conta cu participacion di personanan clave den e sector turistico y agricultor na Aruba. Invitadonan cu a hiba palabra na esnan presente a resalta e importancia di 'Food Security' pa nos pais y como tal, e respaldo cu e agricultornan local lo mester haya for di tur instancia y comunidad di Aruba ta sumamente necesario pa por yega na ta mas independiente pa loke ta cuminda. E pensamiento aki ta cuadra totalmente cu e vision di minister Chris Romero (MEP) –segun e comunicado–, cu kier desaroja agricultura como un pilar economico na Aruba. No

ta un secreto cu e topico di 'Food Security' ta un di prioridadnan di minister Romero, y sigur ta un aspecto cu e titular di e cartera di Sector Primario lo keda impulsa pa por yega na dje den un futuro cercano.

"Tabata un mainta hopi ameno unda cu e intercambio di informacion tabata hopi necesario pa cuminsa crea un accion conhunto entre nos sector primario y turistico, pa asina logra yega na ofrece un pakete Agri-Turistico tambe como producto di Aruba."

Finalmente e comunicado ta bisa cu minister Chris Romero, como e titular di e cartera di sector primario, ta sumamente satisfecho di mira iniciativanan di e indole aki tumando luga pa impulsa nos economia. Door di involucra Aruba su sector primario den e sector turistico, lo por incentiva mas di nos localnan pa cultiva nan productonan na nivel comercial y ofrece esakinan na e diferente establecimentonan cu ta enfoca riba nos turismo.

